

Regional News Unit AIR Aizawl
Saturday, August 03, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Forest Minister Pu Lalthansangan, ram hmasawna ruhrel tithuanawptu ang hiala tunhma atanga mipuiin forest department an ngai thin chu pawia a tih thu a sawi.
- Art & Culture Minister Pu C. Lalsawivunga'n Zohnahtlak te inpumkhat lehzuat nan, Zohnahtlakte tobul chiang taka hriata, zirbing a pawimawh a ti.
- Sawrkar laipui chuan National High-Speed Road Corridor Project 8, km 936-a sei, cheng vaibelchhe sing 5 za 6 sawm 5 leh panga senna tur a pawm.
- UNICEF chuan tunhnaia Bangladesh-a tharum thawhna avanga naupang 32 lai an thi chu a ngai thutak hle.



FOREST MINISTER

Forest Minister Pu Lalthansangan, ram hmasawna ruhrel tithuanawptu ang hiala tunhma atanga mipuiin forest department an ngai thin chu pawia a tih thu a sawia.

Forest enkawlina chu India danpui concurrent list-a awm a nih avangin dan hnuaiah khuahkhirhna tha tak nen humhalh a ni a, chuang chuan Environment Forest & Climate Change department chu namnul mai chi a nih lo a ti.

Nimina Aizawla The Book of Mizoram Plants, Wild Animal, Birds 3rd Edition a tlangzarhnaah he thu hi sawiin Forest Minister chuan Forest department a thawkte'n dan hnuai a ram ramngawte an enkawlina-ah lawmthu a sawi.

Lehkhahu tlangzarh tak ziaktu Pu M. Sawmliana hian hnimhnah, Ramsa leh Sava chungchang engemawzat a lo ziaak tawh a ni.



ADVISER TO CM

Adviser to Chief Minister Pu TBC Lalvenchhunga'n kawng hrang hranga sawrkar sum inren avangin pawisa tam tak an hum thei a ti a, mipui hmasawna tura hman ngei a ngaih thin avangin kawng thenkhatah erawh pawisa hman tam ngai a awm tih a sawi.

He thu hi Akashvani corr nen an inkawmna ah sawiin Adviser to CM chuan department thenkhat ah hna a khaihlak theih dawn avang leh mipui hmasawna tur a khaihlak theih avangin sum renchem vek a theihloh a ti a, sum hman ngei ngaihna tam tak a awm a, inrenchemna an kalpui chu awmze neia kalpui a ni a, MLA te leh officer lian ten MR an chhawr theih chin tih tlem anih avangin thla tin cheng nuai 12 atanga cheng nuai 14 an hum thei tih sawiin insawhngheh kum an hman chuan awmze thui tak a nei dawn a ti.

Pu TBC Lalvenchhunga chuan kuminah leiba chhawm tam tak bakah pension hlauh pekchhuah tur tam tak a awm a ti a, GP pung te nen a vaiin cheng nuai 400 chuang an pe chhuak tawh tih a sawi bawka. Hetihlai hian, sorkar hnathawk hlauh chu a hun takah an pe thei char char a, sum dinhmunin ziaawm lam a pan theih nan theihtawpin hma an la tih a sawi bawka.



ART&CULTURE MINISTER

Art & Culture Minister Pu C. Lalsawivunga'n Zohnahthlak te inpumkhat leh zual nan, Zohnahthlakte tobul Chiang Taka Hriata, Zirbing a Pawimawh tih Pachhunga University College-a Mizo tobul chhuina, International Symposium a hmanpuina ah a sawi.

Pachhunga University College Department of History leh Art & Culture Department-te tangkawp buatsaih Mizo tobul chhuina, 'International Symposium on Mizo Origin : Exploring Narratives of Origin and Migration' hmanpuitu, Art & Culture Minister Pu C. Lalsawivunga chuan Zohnahthlak hnam peng hrang hrangte tobul, thlangtlak dan leh khawsak zui zel dante dik taka hriat theih nan dawhkan atang mai nilo, uluk taka chhui turin a hmuna kalchilha zirchian a pawimawh a ti a, Sawrkar ang pawhin Zohnahthlakte tobul leh thlangtlak dan neih a hun tawh a ti bawk a, hnam anga bo mai loh nan hnam ziarangte chhawmnun zel a tul a ti bawk.

He hunah hian Resource person 'Hmasang Pipute Chanchin' tih lehkhabu ziaktu Pu Liandova, Letpanchaung, Myanmar chuan Mizo tobul chhuina leh thlangtlak dan a sawi a ni.



POSTAL DEPT

Postal Department Mizoram Division hnuaiia Post office 556 Mizoram hmun hrang hranga awm te chuan tunlai thiamna Internet hmangin hna an thawk thei vek tawh.

Postal Department Marketing Executive HS Lalnghakliana sawi danin Mizoram chhungah Post office hmun hrang hrangah 556 a awm a, hengah te hian tunlai thiamna hmanga hnathawh theih vek ani tawh tih sawiin Core System Integrator hmangin awlsam zawka hnathawh theih ani a ti a, kum 2022 May ni 13 atangin Sub Division ah bultanin tun dinhmunah khaw tam zawkah post office awm te chu thlunzawm vek ani tawh tih a sawi.

Pu HS Lalnghakliana chuan Postal Department, Mizoram Division chu NE Circle hnuaiia awmin Ministry of Communication, Govt of India hnuaiia awm a ni a ti a, Mizoram Division chu sub division 4 ah then leh niin Aizawl East leh Aizawl West Sub Division leh Lunglei Sub Division leh Chhimtuipui Sub Division ah te then hran ani tih sawiin un dinhmunah Mizoramah sub post office hi 39 a awm mek a, Branch Post Office 417 awmin a vaiin 556 Post office a awm mek tih a sawi.

Marketing Executive sawi danin tunlai lehkhah sem tih tlem zel ni tawh mahse an hnathawh chu tunlai milin a inthlak ve zel a ti a, State sawrkar in IFMIS an hman angin Core System Integrator hmangin hna an thawk a ti a, hei hian an theihna a tih pun bakah an hnathawh chu a pun phah tih a sawi bawk.

Pu HS Lalnghakliana chuan internet hmanga hna an thawh bakah Speed Post hmangin lehkhah leh parcel thawn te leh ramdanga atanga pawisa inthawn Western Money chu an buaipui hnem tih a sawi a, heng bakah hian pawisa a pung awma dah theihna scheme hrang hrang a awm tih sawiin Mizoram mipuiten pawisa dah khawl uar tura a duh thu a sawi a, Post office a pawisa lut a tamin state sawrkarin pawisa a puk theih a tam thin tih sawiin post office ah sum dah khawlin state tan hna tha tak mi tinin an thawk thei tih a sawi bawk.



KHAWZAWL

Khawzawl Deputy Commissioner Office leh Artificial Limbs Manufacturing Corporation of India te'n Khawzawl District chhunga Persons with Disabilities te tana an hmantur, Aids and Appliances endik na Assessment Camp chu kar kalta chhung khan khaw hrang hrang ah an nei a.

He assessment camp ah hian, Unique Disability Identity Card, Aadhar Card leh Income Certificate te en dik in, tanpuina dawng tur te chu chhinchhiah an ni a. Khawzawl district atangin he tanpuina dawngthei hi mi 179 awm a ni.

ADIP Scheme, Ministry of Social Justice & Empowerment Govt. Of India hnuaiia tanpuina a dawn theih hrang hrang te chu Hearing Aid, Wheel Chair, TLM kit , Walking stick, Adjustable Crutch, Braille kit te a ni.

<><><>

COMPLAINT BOX

Minister te'n an pisa-a mipui tana rawtna leh sawiselna lehkha an thelulh theihna, Complaint box an hunah tun thlengin mipui lehkha theh luh a tam lo hle a.

MINECO-a Minister office hrang hrang tlawh kualtu kan corr sawi danin, Minister 11 zinga 10 ten an pisa luh dawnah complaint box an hung a, heng bawmah te hian lekhathawn tla a tam lo hle a, minister 5 te bawmah phei chuan an hun tan atanga nimin thleng khan mipui atangin rawtna leh sawiselna lehkha a la lut lo a ni.

Minister zingah Minister of state Pu B Lalchhazova bawm a lun ber a, bawm an hun tan atanga nimin thleng, thla 4 bawr vel chhungin lekhathawn 14 a tla tawh a, chung zinga a tam ber chu a enkawl zinga mi, land Revenue and Settlement department kaihnhawih a ni a, ram pass chungchang a ni ber a, Minister zinga bawm hung hmasa ber Health Minister Pi Lalrinpuii bawmah lekhathawn 10 bawr vek a tla tawh bawk a, Pu K Sapdanga bawmah 1, Pu F. Rodingliana bawmah 1 leh Dr. Vanlalhlana bawmah 2 a tla tawh bawk a ni.

<><><>

LAWNGTLAI POL

An lungawilohna lantira Lawngtlai District a Petroleum Dealer ten kar khat dawn Tuialhthei an chahluh tawh loh hnuah nimin atang khan titawpin, dan pangngai angin an kal chhonzawm.

Lawngtlai District Petroleum Dealer te chuan thuchhuah siamin, July 29 atanga Tuialhthei an chah belh tawh loh avangin Lawngtlai District chhunga Filling station-te chuan Tuialhthei dahkhawl an nei tlem tawh a, Sawrkar hotute, Tlawmngai pawl hruaitute leh Kohhran hruaituten an ngenna a zahawm an tih bakah mipui tan hun rei tak harsatna siam sak tha an tih loh avangte leh harsatna an neih thenkhatte chin fel anih theih dawn avang te in Tuialhthei chahluh loh an kalpui chu titawp an ni tih an sawi.

Lawngtlai District a Filling Station atanga Tuialhthei hralhchhuah leh leituten harsatna an tawh thin vangin Petroleum Dealer te hian an harsatna sutkian a nih theih nan hma an lakna tichak turin tunkar Thawhtanni atang khan Tuialhthei hi an chahlut lova, hetihlai hian Central YLA chuan Rakhine State ah dan lova Tuialhthei leh Leitha luttur ngawrh takin an ven chhonzawm a.

Lawngtlai District Petroleum Dealer te chuan Petrol la thinte zingah barrel 5 aia tam la turte chuan Deputy Commissioner's Office atangin permit lak zel ni se, permit nei motor-te chu CYLA duty ten dan loh nise" tia District thuneitu hova Meeting an neih a an thurel chu an mahni hriattir leh berawn lovin tihdanglam a nih thu an sawi a, an thurel siamthat a ni chu an hriatpuiloh thu sawiin, barrel 5 aia tam Tuialhthei la turte chuan DC Office Lawngtlai atanga permit la hmasa tur leh, permit neilo te chu barrel 5 aia tam an pektheihloh tur thu an sawi.

Sawrkar, NGO leh pawl hrang hrang ten ram leh hnam a him theih nana theihtawp an chhuahna leh hma an lakna te lawmawm an tiin an thlawp tlat tih an sawi a, Mipui lam pawh dan lo anga Tuialhthei hralh leh lei kawngah inhnawnawih lo hram turin an in ngen a ni.

<><><>

CONGRESS PR

Mizoram Pradesh Congress Committee MPCC Treasurer Dr. Lalmalsawma Nghakan Sum inrenchem austerity measures tih leh ZPM inhmehloh thu in sawi a hlawh chhan chu ZPM sorkar a fawngchelhtuten chhia leh tha hriatna an hmansual avangah a ngai tih a sawi.

Congress party Friday political session nimina Aizawl Congress Bhavana neihah he thu hi sawiin MPCC Treasurer chuan Enchhin sorkar, kalphung thar sorkar chuan Sorkar kalta ten an tihngam loh tur an rawn ti chho mawlh mawlh mai a ni a ti a, Minister of state rank 7 an awm a, adviser panga, secretary rank an awm thluah a, consultant leh Board chairman duhsak zawng an indah a, heng ho zawng zawng ken telin sum a sen tur zat hi a tam tham hle a ni a ti a. Austerity measures leh heng an kalpui dan hi thil inhmeh lo tak a ni a ti a. Mipui te phurrit siam belhin MNF Sorkar tih ang bawkin Petrol leh Diesel a chhia a pung thur thur a ni.

Buhfai supply tu thlan danah ringawt pawh austerity measure an lak loh zia a Chiang hle a a chhang sang zawk an pek avang hianZPM sorkar chuan kum tin Cheng nuai 790 dawn a sen belh dawn a ni a ti.

Ram pumah mipui an rum mek tih sawi bawk a. Dr. Lalmalsawma Nghaka chuan Sawhthing chingtute'n an sawhthing a tam avanga rum an tam hle a, vawk vulltute an rum bawk, kawngpui a chhe em em bawk tih sawiin mipuite harsatna sukiantu ni turin ram hruaitute an intihhniam a ngai a ni a ti bawk.

<><><>

HIGH SPEED CORRIDOR

Sawrkar laipui chuan National High-Speed Road Corridor Project 8, km 936-a sei, cheng vaibelchhe sing 5 za 6 sawm 5 leh panga senna tur a pawm. Heng project te hian bungraw thawn kualnahte, lirthei tawt lutuk tihlem kawngah leh ramchhung inkalpawhna tihchangtlun kawngah hmasawna tam tak a thlen dawn a. Heng project te hi kum 2047 India hmahlir tihhlawhtlinna anih thu Union I&B Minister Ashwini Vaishnav chuan a sawi.

Porject pawm zingah hian km 88-a thui Agra-Gwalior National High-Speed Corridor leh km 231-a thui four-lane Kharagpur-Moregram National High-Speed Corridor te pawh an tel a ni.

<><><>

UNICEF

UNICEF chuan tunhnaia Bangladesh-a tharum thawhna avanga naupang 32 lai an thi chu a ngai thutak hle. UNICEF South Asia regional director Sanjay Wijesekera chuan Zirlaiten lungawilohna lantira tharum thawhna thlen hnuah Bangladesh-ah hian kar khat a cham thusawiin naupang tam tak tharum thawhna thleng avanga an thi chu pawl atih thu a sawi a. UNICEF chuan naupang 2 aia tlem lo he buainaah hian an thi tih a finfiah tawh tih sawiin UNICEF chuan hetiang a tharum thawhna hi a dem takzet a ni a ti bawk.

<><><>

PARIS OLYMPIC

Paris Olympic neih mekah India mipa hockey teamte chuan bungthar kaiin Pool B match hnuhnung berah Australia 3-2 in an hneh a. Kum 52 hnuah Olympic-a Australia an hneh leh hmasak ber a ni. Hetihlai hian mipa badminton quarterfinal ah nizan khan Lakshya Sen chuan CHinese Taipei Chou Tien Chen hnehin Semifinal a lut a. Shooter Manu Bhaker pawhin 25m pistol ah qualification paltlangin a vawit hum nan final a khel dawn a ni.

A pumpuiah China chuan gold medal 13 lain hma a hruai a, France leh Australia ten Gold 11 ve ve lain an dawt a. USA in gold 9 lain a palina an ni mek a. India chuan bronze pathum lain 48 na a hauh mek a ni.

<><><>